

欽
定
全
唐
文

欽定全唐文卷八百六十二目錄

邊魯

儒林郎試大理評事行幽都府路縣令邊府君敏

墓石

高錫

諫親決庶政疏

侯益

請修唐莊宗祠廟奏

乞賜寺名奏

竇儀

條陳貢舉事例奏

邊光範

請簡都督刺史疏

趙玘

唐故北海戚處士墓誌銘

李昉

濟州刺史任公屏盜碑

欽定全唐文卷八百六十二

邊魯

魯五代時人

儒林郎試大理評事行幽都府路縣令邊府君敏

墓石

維丙戌之歲仲商之月又十六日嗚呼我先伯父長官邁

疾傾殂於故里以

闕

月十四日攢塗於正寢欲詢踰月之

制得以送終繼逢逐鹿之秋未遑安厝綿聯歲序可得而

知粵有朝議郎試大理評事前行鄭州鄭縣令兼侍御史

賜緋魚袋慎奇光祿大夫守刑部尚書行御史中丞上柱

國陳畱縣開國伯食邑一千五百戶歸讜卽長官之弟

闕

字姪也念深同氣痛切嚴書因感義於鵲鴿遂撫心於霜

露特齋餘俸卜葬先靈乃謂諸姪孫曰方今海宇寧謐三

農告隙俾營遠日之禮貴就叶龜之吉若非刊勒莫紀聲

容其所誌銘汝當論撰罔遺其善弗虛其美魯仰奉明誨

難愧匪詞追往質今對揚實錄謹敘長官姓邊諱敏字德

成其先陳畱人也本支百世代不乏賢或魚符而列職或

墨綬以聯芳王父諱行存順州司馬神情磊落間氣深沉

抱瓊偉之奇才蘊中和之至德安鍾厥後實曰俊明烈考
諱承遇任邱令孝治承家溫恭秉性莅事每勤於夙夜臨
民恒示於愛威而教彼子孫備有趨庭之訓敬其祖禰必
勤薦享之儀先妣太夫人太原郡王氏天資益秀婦道彌
芳含茲淑善之風終啟繁昌之允恭惟長官英姿倜儻偉
量恢宏辭才則賈馬無稱孝敬乃曾顏讓美當未登顯仕
恒奉溫清見喜色以問安露憂容而侍疾身能禮樂性存
典墳爰從赴聘於招弓便可分榮於宰字擢爲高陽縣令
莅政之後嘉聞允彰單父臨民綽有七絲之詠中年作宰

不無三異之稱及罷任之初未及踰載而除官路縣復起
頌聲屏宣卧虎之威廳集巢鳩之美立言必雅莫常顯已
所長用意絕私未可屈人之短大小之物罔不躬決聞望
俱高位祿已重賦潘岳閒居之詠起陶潛歸去之思固罷
厥官卻訪田里豈謂景福未終昊天不祐碧落之孤雲易
失風窗之短焰難停厯任三十年享壽五十八我伯母平
昌郡孟氏亦以不登遐壽奄逝流光貞魂諒合於延年青
骨同安於蒿里有子四人長日照故幽都府永清縣令松
筠定操金玉溫身方傳襲慶之榮俄邁涉洹之夢次日隱

前攝鄭州長史仁義兼資溫恭有譽守其祭祀不怠厥初
次曰延徽以積慶韞光未趨顯仕而歿幼子商裔運州左
都押衙以職居鄉外身列陪臣空深怙恃之思莫奉松楸
之禮孫子六人讓能去非光又霸孫嵐孫天畱並謙沖立
志詩禮飭身咸懷踵慶之風大有興宗之譽孫女三人義
姐王師小姐或訖有絲蘿或年纔齠齒克著雍容之德允
守貞順之規於戲生而無過歿而有後者其爲長

闕二幼

闕五

不歌春杵不鳴歸墟也

闕一

連車乃鄧梁之

闕一贈

弔有

闕一

則金張之絲以庚申年十一月廿四日安神於

任邱縣長邱鄉孝慈里靖隧先墳之次禮也靈輜駕野丹
旒懸空爰開烏兆之塋實掩賢英之墓恭承日照嚴旨謹
作銘云

博哉貴胄踵慶於門山河其度金玉其身蘊十善道爲百
里君立功於國流愛於民豈期遘禍一旦歸魂委宅幽壤
慮謝音塵爰刊貞琬紀錄其勤日往月來兮良銘此地付
子孫兮傳揚兮萬春

高錫

錫五代時人

諫親決庶政疏

四海之廣萬幾之衆雖堯舜不能獨治必擇人而任之今陛下以一身親之天下不謂陛下聰明睿智足以兼百官之任皆言陛下偏迫疑忌舉不信羣臣耳不若選能知人公正者以爲宰相能愛民聽訟者以爲守令能豐財足用者使掌金穀能原情守法者使掌刑獄陛下但垂拱明堂視其功過而賞罰之天下何憂不治何必降君尊而代臣職屈貴位而親賤事無乃失爲政之本乎

侯益

益汾州平遙人唐光化中隸李克用麾下天成中累授費州刺史應順初加西面行營都巡檢使晉初領光州防禦使改河陽三城節度充鄴都行營都虞候移鎮潞州天福四年遷武寧軍節度同平章事五年徙鎮泰州充西面都部署遷河中尹護國軍節度契丹入汴授鳳翔節度漢祖卽位加兼侍中乾祐中授開封尹兼中書令封魯國公周廣順初封楚國公改太子太師又改封齊國公顯德元年致仕入宋乾德三年卒

請修唐莊宗祠廟奏

伏自收復汜水關日以逆賊張從賓於莊宗舊蓋亭子上
與官軍鬪敵臣以爲莊宗厯數雖謝精爽猶存願靜妖氛
特立祠廟果應虔禱尋獲關防臣欲排此瓦木往就修營

乞賜寺名奏

臣頃歲曾爲偏將往伐叛逆有願如范延光歸降兵無血
刃卽於招討使楊光遠中軍寨建一佛刹自後延光果能
歸款克契發心光遠尋施錢三百貫文與臣共力營葺今
修成天王院一所乞賜名額

竇儀

儀字可象薊州漁陽人晉天福中舉進士漢初召爲左補
闕禮部員外郎周廣順中累遷儀部侍郎拜端明殿學士
判河南府兼知西京畱守事恭帝卽位遷兵部侍郎入宋
乾德四年卒

條陳貢舉事例奏

伏以朝廷設科比來取藝州府貢士祇合薦能爰因近年
頗隳舊制其舉子之弊也多是纔謀習業便切干名周儀
未詳赴三禮之舉公穀不究應三傳之科經學則偏試帖
由進士則鮮通經義取解之處譸張妄說於辛勤到京之

時奔競惟求於薦託其舉送之弊也多是明知荒淺具委
克麓新差考試之官利其情禮之物雖所取無幾實啟幸
非輕凡對問題任從同議謾鑒通而鑒否了無去以無畱
惟徇人情僅同兒戲致令至時就試不下三千每歲登科
罕踰一百假使無添而漸放約須畢世而方周乃知難其
舉則至公而有益於人易其來則小惠而無實於事有益
者知濫進不得必致精勤無實者欲多放無能虛令來往
且明經所業包在諸科近間應者漸多其研精者益少又
今之童子比號神童旣幼穉之年稟神異之性語言辨慧

精采英奇出於自然有則可舉竊聞近日實異於斯抑嬉
戲之心教念誦之語斷其日月委以師資限隔而游思不
容仆扶而痛楚多及孩童之意本未有知父母之情恐或
不忍而復省試之際歲數難知或念誦分明則年貌稍過
或年貌適中則念誦未精及有司之去畱多家人之訴訟
伏況晉朝之日罷此三科年代非遙勅又見在今宜釐革
別俾進修臣謬以非才獲承此任本重難而爲最復遺闕
以相仍虔奉勅文重令條奏或從長而仍舊亦因弊以改
爲上副聖情廣遵公道除依舊格勅施行外其明經童子

請卻依晉天福五年勅停罷任改就別科赴舉其進士請
今後省卷限納五卷已上於中須有詩賦論各一卷餘外
雜文謠篇並許同納祇不得有神道碑誌文之類其帖經
對義並須實考通三已上爲合格將來卻復晝試候考試
終場其不及第人以文藝優劣定爲五等取文字乖舛詞
理紕繆最甚者爲第五等殿五舉其次者爲第四等殿三
舉以次稍優者爲第三第二第一等並許次年赴舉三禮
請今後解試省試第一場禮記第二場周禮第三場儀禮
三傳第一場左氏第二場公羊第三場穀梁並終而復始

學究請今後周易尚書併爲一科每經對墨義三十道仍
問經考試毛詩依舊爲一科對墨義六十道及第後請並
咸爲上選集諸科舉人所對策問或不應問曰詞理乖錯
者並當駁落其諸科舉人請第一場十否者殿五舉第二
場三場十否者殿三舉其三場內有九否者並殿一舉其
進士及諸科所殿舉數並於所試卷子上朱書封送中書
門下請行指揮及罪發解試官監官等其監官試官如受
取解人情禮財物請今後並准枉法贓論又進士以德行
爲基文章爲業苟容欺詐何稱科名近年場中多有詐僞

託他人之述作竊自己之聲光用此面欺將爲身計宜加
條約以誠輕浮今後如有倩人述作文字應舉者許人告
言送本處色役永不得仕進又切覽唐書見穆宗朝禮部
侍郎王起奏所試貢舉人試訖申送中書候覆訖下當司
然後大字放榜是時從之臣欲請將來考試及第進士先
具姓名雜文申送中書奏覆訖下當司與諸科一齊放榜
邊光範

光範字子儀并州陽曲人後唐天成二年起家榆次令召
爲殿中丞長興四年改太常丞晉天福中累遷光祿少卿

少帝卽位拜右諫議大夫改給事中開運元年權知鄭州
二年入爲樞密直學士拜尚書禮部侍郎知制誥充翰林
學士漢初改檢校刑部尚書衛尉卿周廣順初出知陳州
遷祕書監召拜御史中丞復爲禮部侍郎世宗卽位改刑
部侍郎遷戶部入宋開寶四年卒

請簡都督刺史疏

臣聞太宗有言曰朕居深宮之中視聽不能及遠所委者
惟都督刺史則知此官實繫治亂本須得人臣竊見今之
刺史或因緣世祿或貢奉家財或微立軍功或但詢官序

實恐撫民寡術抑貪吏以無方以此牧民而望民安未可得也特乞除此舊訛委其能吏將祛民病永召時和

趙玘

玘澶州人晉天福中補集賢小史累遷秦成階等州觀察判官後以城降周顯德初授郢州刺史歷汝密澤三州刺史入宋累官左監門衛大將軍太平興國三年卒

唐故北海戚處士墓誌銘

處士諱高字崇景其先北海郡人枝派清遠不可殫言上因官從職遷爲越州諸暨靈泉之里人也曾皇父諱朝皇

父諱霞皇考諱防清崇道德風月怡情皆沒跡雲端世推之上也處士才鋒韞銳仁海凝波不重百辟之榮而嗜寸陰之道見一善而忘百非洞施恩而不念報滔滔爲冠世媒階蕩蕩作後來梁櫓何期覆載興否三清晦明淑人君子胡不萬齡處士芳壽不惑之歲未昇壯室之年有五以中和三年歲次癸卯秋九月甲子朔十九日壬午之辰天降深崇魂沉逝流遂奄終於後流私第嗣子三男二女孟曰崔婆仲曰啍咻皆當齟歲禮義未分扶柩啞嘔孰不傷憫痛哉季子董婆襁負懷抱倚廬之門運業何因終天之

苦長女娉受周氏禮未及歸幼女齒未及笄遽遭酷罰夫
人清河張氏媚情慘裂涕泗交凝笄纒無光蓬鬢髻首泣
青萍之去跡哭綠綺之斷絃夫人遂抑哀整容咸告兒女
曰禮難可踰吉擇日月善卜名原以年冬十月甲午朔廿
七日庚申將窆於石解皇父之塋右壬首之墳原禮也虞
以日居月諸山谷渝變哀告請銘玘宿契金石敢慙瓌才
掩涕握管而爲銘曰

薜之華蜉之游石之火水之漚四之質難久畱尊道德洞
仁義望長材成大器孰知天興禍至醴泉竭德星墜女未

歸男尚稚孀妻房冷秋水覩遺蹤逗雙淚宿何緣無終始
泣告余請銘誌

李昉

昉字明遠深州饒陽人漢乾祐中進士歷集賢殿修撰周
顯德二年擢主客員外郎知制誥集賢殿直學士四年加
史館修撰遷屯田郎中翰林學士入宋累官中書侍郎平
章事至道二年卒

濟州刺史任公屏盜碑

降婁魯之分濟河惟兗州大野旣荒西狩獲麟之地崇山

作鎮東溟見日之峯郡國已來土賦稱大舊制非便必惟
具新蓋民衆吏少則奸易生治稱任平則時克又皇朝建
濟州於鉅野縣猶魏室分厭次爲樂陵郡耶我太祖聖神
恭肅文武孝皇帝發天機張地紀皇建丕祚帝於萬邦不
枉政以厚民生不尅法以重民命以爲分是理頒是條施
之一方而用寧通之四海而不泥者其惟良二千石乎故
所選牧守咸用賢能得人者昌於斯爲盛今皇帝嗣守洪
業光揚聖謨率勤儉爲天下先惟幾微成天下務所謂皇
王綱統之道明矣邦國紀律之務成矣而研覈精鍊日不

暇給以戒弛墮之患所謂視聽聰明之德充矣內外上下
之情通矣而啟迪開納國無留事以防壅塞之弊凡軍國
機要刑政樞務事無巨細必詳於聽覽凡公侯卿士牧伯
長史任無重輕必考其才器是以設爵愈重分職愈精人
人自謂我民康家家自謂我土樂粵嗣位元年冬十月詔
以前趙州刺史任公檢校太保牧於濟濟新造之郡也麟
州之名其廢已久歲月差遠土風寢醺民忘其歸或肆爲
梗重以控地旣大苞荒用遐山幽藪深亡命攸萃灌莽悉
伏戎之地桂蒲爲聚盜之資妖以人興嘯召或成於風雨

法由貪弊羈縻遂至於逋逃良田有蝨實害嘉穀惟夫年
號豐稔時無札瘥滯穗餘糧棲偃於千畝京倉坻庾阜衍
於九年猶或脅遊惰之夫釋耒耜之用鉤鋤弦木竊弄於
鄉閭之間矧饑沴之歲乎至乃野無戰血天藏殺機鞏甲
凋戈戢鋒鋌於武庫庸租井賦緩征督於鄉胥尚或誘輕
生之民聚無賴之族巢梟穴狡竊發於海溟之中矧兵革
之際乎民旣病而疇思其治醫雖良而藥或未工蓋用有
所長才難求備文吏束名教之檢則必曰導之以德盜用
侮而益暴法家持剛猛之折則必曰齊之以刑盜用駭而

彌逸自非文武兼資之用英雄斷制之才蒞是任而居是
邦者厥惟艱哉公天授將才生知理本以戰則勝元機出
應變之先以化則孚心術同希微之表抗一旅而戾止撫
萬室以瞻言以爲川壅污潢利源派而當宜濬畝田荒蕪
藂樹嘉苗而必極芟夷於是令以先庚申之後甲介馬負
先馳之勇陰門提夜出之兵獵叢社以平妖盡誅其類狩
平林而得獮悉伏其辜狂童震驚四野竦駭狼心盡革民
患皆除乃峻以隄防斂其窳穽決獄盡疎其畱滯窮源用
滌其瑕疵分命鄉民設其警候伏乙夜以蒐慝扼衝途而

伺奸盜跡之來若雁置畢申命降寇招其叛徒恩信著用以結其心攝伏羈畱以杜其變盜意之改若愈膏肓非夫術以變通奸由惠照太阿所擊荆洪鐘而不畱玉弩載張應靈機而自發其孰能如此耶甚矣哉除盜之難其來有素中古澆漓之後羣心變詐之興縱燎夷荒或敗蕭蘭之秀尋柯伐蠹因傷杞梓之材唯賢者之用心則是非而無混故公嫉盜之意切而誅盜之令嚴去盜之術行而屏盜之譽顯夫盜旣去矣民將息矣然後緩之以約束寬之以法令養之以惠愛勸之以禮讓化之無或戾信之無或欺

則龔黃之風彼亦奚尚是以黃髮鮐背之叟農工商賈之類含哺而嬉旣舞且詠以爲康莊播頌雖昭盛德之容琬災裁碑宜耀披文之質郡將官吏唱言僉同乃詣闕上陳願塞羣望帝用嘉許綸言式敷詔左拾遺李昉俾文其事以述濟民之請微臣不才孤奉明旨揣闔祕思懼遺休聲稱實課虛斯謂無愧而太史氏紀功臣之績云公名漢權蜀國人也以武畧事累朝以戰功登貴仕亟握兵要連分使符初牧於丹有排亂折衝之積移治於趙有安邊鎮靜之功所至皆有能名而濟之人獨能宣其事業以示不朽

亦可謂賢矣系曰事有該於謠俗傳於耆舊者千載之下
尚爲美談矧文以銘而勒之於石乎他日知使君之政者
其將質於此故其詞云

道失其要淫刑而暴人心用違良民爲盜令嚴而申政肅
而淳人心用依盜爲良民民卽盜也盜亦民也善惡之化
實由乎人猗歟使君克善其治始以嚴誅去其奸宄申以
約束靜其鄉里里無情農鄉無狡童曾未逾月澄清四封
相彼林矣豈無豺虎暴心不生與麟爲伍循彼陔兮亦有
荆棘惡蔓旣除與蘭同色使君之賢如山如淵濟民之頌

聲聞於天刻石播美垂千萬年

欽定全唐文卷八百六十三目錄

竇儼

上治道事宜疏

請禁諸鎮酷刑疏

陳政事疏

貞元泗州大水論

陶穀

賜華山處士陳搏勅

紫芝白兔頌

請疏理獄訟瘞埋病亡奏

請禁伐桑棗奏

請郡牧不與卑冗官同班奏

請停廢教習舞郎奏

龍門重修白樂天影堂記

義成軍節度使贈太保史匡翰碑銘

并序

楊昭儉

諫宥張彥澤疏

欽定全唐文卷八百六十三

竇儼

儼字望之晉天福六年進士歷左拾遺仕漢爲史館修撰遷金部郎中改中書舍人周顯德中累拜翰林學士判太常寺入宋終禮部侍郎

上治道事宜疏

伏以歷代至理六綱爲首一曰明禮禮不明則彝倫不敘二曰崇樂樂不崇則二儀不和三曰熙政政不熙則羣務不整四曰正刑刑不正則巨姦不懾五曰勸農農不勸則

資澤不流六曰經武武不經則軍功不盛故禮有紀若人之衣冠樂有章若人之喉舌政有統若人之情性刑有制若人之呼吸農爲本若人之飲食武爲用若人之手足斯六者不可斯須而去身也陛下思服帝猷寤寐獻納亟下方正之詔廓開藝能之路士有一技必得自效學攻百端靡不明至故小臣不揆愚鄙欲有陳導於禮樂刑政之內勸農經武之中相今所宜各具疏列其一曰夫禮者太一之紀品物之崇與天地同其節與陰陽順其道協於分藝行於國家本之以忠孝文之以倫義君臣父子夫婦之制

冠婚喪祭射御之容朝聘享宴之宜軍旅田獵之事各有
宜稱不相侵越所以講信修睦所以洗心防患上得之尊
下得之安定親疏而別同異明是非而彰貴賤執之則致
福繆之則招悔憲物成教崇政明本未有不繇於禮者也
自五帝之後三王以來有益有損或因或革咸有章憲書
於冊書浩浩千編不可遽悉越在唐室典章頗盛程軌量
昭采物酌中古訓垂法百代則有開元禮在紀先後明得
失次其沿變志其楷式則有通典在錄一朝之事包五禮
之儀義類相從討尋不紊則有會要在此三者聖教經制

國之大綜也爰自梁朝之後仍世多故典臺之官皆差使於公務禮直之吏悉昧昏於檢按至今每有戎祀之事朝會之期多於市廛草議定註前後矛盾卒多牴牾臣竊以保殘守闕因狹就寡乃暗主之事非明君所爲豈可以光陛下超世之宏圖爲大朝千載之盛美也所宜闡崇令猷以立國典綴敘舊書以爲邦紀義在精審理資端要可以範圍五帝楷則萬古彰陛下之聖明禮不虛道者也伏請依唐會要所設門類上自五帝迄於聖朝凡所施爲悉令編次凡關禮樂無有闕漏開元禮通典之書包綜於內名

之曰大周禮俾禮院掌之太常博士如得其人宜久其職
年深則兼官在任勿使旁轉如是則助風教而彌隆昇典
制於將替隱覈前軌聲施無窮者也其二曰夫樂者以德
爲本以聲傳御中出所以導志外揚所以審政有天地辰
宿有軌數形色有陰陽逆順有離合隱見天數五地數六
六五相合故十一月至生黃鍾黃鍾者同律之主五音之
元宮也元宮之諧於仲呂母子也傳於林鍾夫婦也迴於
大簇父子也聚於南呂子婦也兩陽必爭二陰必乖故抗
衡者多異前五相追而後五相隨蓋繇是也一章之中凡

有七閏亥未巳丑酉午寅者七閏之正也日有盈縮之度月有遲速之期故或進於前或退於後陰陽之理也六鍾六間十二節凡二十有四位聲氣之大率也平分爲七直而畧其餘則子寅卯巳未酉戌謂之羽子寅辰午未酉亥謂之宮子丑卯巳未申戌謂之角子卯辰巳未酉戌謂之商此四者靡靡成章峻而清厲鄭衛之音也與夫推厯生律以律命宮九六之偶旋相爲宮三正生天地之美七宗固陰陽之序者於其通人神宜歲功生成範宜之德紀協長大之算則精麤異矣在乎審治亂察盛衰原性情應形

北則殊塗而同歸也三正者一爲天二爲地三爲人七宗者黃鍾爲宮大簇爲商姑洗爲角林鍾爲徵南呂爲羽應鍾爲變宮蕤賓爲變徵角爲木商爲金宮爲土變徵爲日變宮爲月徵爲火羽爲水龍角元龜天豕井侯主乎角平亢河鼓樓聚興鬼主乎商天根須女庖俎鳥啄主乎宮辰馬陰虛耗頭天都主乎變徵大火兵封天高鳥翼主乎變宮龍尾元室四兵天倡主乎徵天津東壁參伐輶車主乎羽角之數六十有四商之數七十有二宮之數八十有一變徵之數五十有六變宮之數四十有二徵之數五十有

四羽之數四十有八極商之數九十陽之數一百二十有八陰之數一百一十有二五音之數畢矣神無形而有化處乎聲之門故昭之以音合之以算音以定主算以來象觸於耳而激於心然後可言其樂也其音五其聲十二其調六十雅部之樂也其音四其聲八其調二十有四胡部之樂也隋唐以來樂兼夷夏天寶之世雅部大備寶應之後音律漸衰郊廟殿廷舊事失次洎黃巢盪覆京兆鐘磬皆毀龍紀返正之歲有司別創樂懸乘風雖存旋宮何在音範寢失至今闕然豈可以一時偶失之事爲百代無窮

之制何以訓正四方綏和百神軌物垂則示人之極也昔唐虞厯載頌聲方作文武相繼樂教大同陛下布昭聖武彰信天下宗社靈祇聿監明德所宜憲章成式不失舊物原始以要終體本以正末使樂與天地同和禮與天地同節伏請命博通之士上自五帝迄於聖朝凡樂章沿革總次編錄凡三絃之通七絃之琴十三絃之箏二十絃之離二十五絃之瑟三漏之簫六漏之簫七漏之笛八漏之箎十三管之和十七管之笙十九管之巢二十三管之簫皆列譜記對而合之類從聲等雖異必通編於厯代樂錄之

後永爲定式名之大周正樂俾樂寺掌之依文教習務在
齊肅如是則可以移風俗和上下和順之象著則嘉盛之
德備則六變至幽深九奏達高明知樂之爲大者也其三
曰夫政者正也以正率下下思盡誠則上無闕政人能持
政非政持人若失人而務政則雖勤而何益故人道敏政
政在擇人擇人之先自相而始登庸廊廟則有經啟措置
之權入侍帷幄則有將近承弼之任機事攸綜號令攸發
平章於百揆維制於四方不可不重也唐末政出中要輕
於爰立才處輔相之任便兼公揆之官卿大夫奔競公行

禮讓道息未得之日則以致身富貴爲馳騫旣得之後則以與國休戚爲憂虞乃三緘於統要之司獨善於兼濟之職但思解密勿之務守崇重之官逍遙林亭保安宗族於身之謀甚利於國之效如何方今宰臣實罄忠力燮和元化則歲以之豐稔攸敘彝倫則時以之雍靖上無闕政下無異議固能明舉賢才羅濟經畧也伏請令宰臣於南官三品之中兩省給舍已上有能經營國家寧衛社稷者具名以舉若陛下素諳才業上符定制則輔相公揆之授誠亦得宜陛下嚮不知名或官品未稱則令以本官權知政

事若尚書承郎權知政事則兼散騎常侍之官陛下歲年之間察其爲作如能興利除害獻可替否進賢才退不肖則遷其官加其秩官高者則受平章事未高者但循資而轉且令權知如其非才即便守本官罷知政事讓其舉主令廷謝知過亦繇子玉敗軍令尹當責之義也書曰試可乃已又曰歷試諸艱今班行之中有員無職者大半可令量才授任臨事制宜出則以公務效試入則以舊位登敘任事者有賞不任事者當黜黜陟旣明天下自正此則爲政之道畢矣其四曰刑者五行之鞭策五性之權衡下民

之隄防有國之紀律自古五刑之設期於無刑仲尼曰民有輕辜必求其善以赦其過民有大罪必原其故以輔其化如有死罪期使之生則其善也刑肅俗弊禮謂疵國勝殘去殺傳稱善人昔漢文斷獄四百殆致刑措唐朝貞觀之世歲決死罪二人今陛下恤刑慎獄義權情恕非不至也而天下冒禁麗法者甚眾殊死大辟者頗多蓋繇未塞其源而理其著者也省刑之要厥有二端一者謹吏二者息盜謹吏在乎責長息盜在乎類取吳姬羣笑孫武加戮於隊長此責長之明效也襄民不道班伯得賊於首豪此

息盜之良術也夫一縣之政總於令長令長正下吏自肅
一州之權統於牧守牧守繆僚屬必濫濫之與肅上使然
也近代下民之訟多訟令佐敢訴牧守十中或一訟令佐
者皆得理察訟牧守者十無一問縱或詰之而歸罪陪隸
者眾矣斧鉞不用刀鋸日弊古人恥之典刑不阿貴賤貴
猶當罰賤者自戒如是則官吏畏法刑損其半矣而又除
其寇盜使無逸越除盜之術大概有三一者使賤人徒侶
自相糾告糾告不虛則以所告賊產之半賞其告者或一
人能告十賊亦以十賊半產與之親屬之間此許容隱在

於用權救弊亦可暫更今後有骨肉爲非許令首告然所
被告者不可令至極刑傷宗族之情失風教之義只令通
指同行徒侶則除惡甚多骨肉所首之人特與疎放如是
則同惡自相疑阻爭先於陳告骨肉欲保其親競來於原
首此息盜之上策也二者如鄭州新鄭一縣團結鄉社之
人名爲義營分立將佐一戶爲賊則累其一村一戶被劫
則罪其一將大舉鼓聲之所壯丁雲集賊徒至多不過一
二十數義營所聚動及百人賊人奔逃無有免者見今鄭
州封內唯新鄭獨免敎勦頃歲尉氏強民潛往密縣行劫

迴入新鄭疆界殺獲苦無漏遺豈止自部之中不留凶慝
兼令涉境之寇難出網羅此息盜之中策也三者有賊之
後村人報鎮鎮將詣村驗蹤團保限外不能獲賊眾罰鎮
戍此息盜之下策也如是則奸盜漸息刑又損其半矣何
慮漢文之年貞觀之世不在於今時矣其五曰農者至正
之道自然之資爲邦大本當今急務欲國家之康濟在府
庫之充盈欲府庫之充盈在田疇之修闢人力可以課致
地利可以計生若地利有遺人力不勸欲邦寧本固化洽
時雍不可得也今宰牧怠職百姓怠業曠土不墾履畝是

憂但隨宜以耕耘惟天時而是賴苟有水旱其將奈何危殆之機在乎返掌晉朝開運之歲卽其驗歟夫欲富國強兵愛民利物興事任力崇德尊道敷至化恢長御革頽風洽豐澤無不繇家給人足而馴至其道也家給人足始於務農務農之原實有三術一曰廣田二曰已債三曰節費廣田則所獲豐羨已債則儲積可保節費則歲計有餘今民不廣田良有以也蓋慮無盡地之稼括爲稅簿則并竭所收輸不滿要誰不懼也晉漢二代累發德音使民多種廣耕只以舊額供賦旣種之後旋以見苗計租以至倉箱

匱空鄉井愁歎先皇享御之始赦書節文之中亦勸民勤勞不殊前意至今曠隙之地荒萊不開繇於誠信前失民無固志者也夫爲政之先莫若著信商君移木豈禮也哉蓋使人信之則無不治也陛下宜散下明詔使民廣田但輸舊租永不簡案上言宗廟以表至誠令州郡懸法之所刻石示民民必信之而田廣矣田廣則多獲多獲則民足王者藏於天下實一國之富完此廣田之上策也小畝步百周之制也中畝二百四十漢之制也大畝三百六十齊魯之制也今所用者漢之中畝若步以大畝之田輸其中

畝之稅或額不敷舊則虛加滿之逮於次年而田自多矣
此廣田之中策也前所言已債節費利莫大焉今編戶之
毗以債成俗賦稅之外罄不償債收獲纔畢率無困倉官
有科折之弊私有酺釀之緡倍稱速息半價速賣則利貸
一斗而償四斗矣欲民不困豈可得哉此外鄉閭之中嘗
有酒食之耗諂僧佞佛相扇成風且瑞雪甘雨和風所致
非爲一鄉一里委曲而降小民無知競作齋賽一歲之內
數數有之是則債利之劫民也將倍於公賦齋賽之蠹民
也又等於王租欲民之饒終不可致莫若已債節費歸利

於民起於來年不得通債今歲見償之者但令以本債償之留其利餘爲民不債之備則民食資半矣夫陽秋之候豺獾尚祭民祭里社自古而然宜於二社之辰得以祭餘共相飲食其餘祈禱散賽之事嚴禁罷之則民食又資其半矣民食旣足則民力普存民力普存則穡事敦業穡事敦業財用益豐因其利而利之則國富刑清天下知禮節矣其六曰兵者所以成武功遏亂畧行天討順人心混一區宇昭宣文德三五之代不能去兵故軒戰阪泉堯征丹浦西伯戡黎之誥成王踐奄之誓卽其前躅也陛下卜世

之數莫知其紀五德所正涖萬方之率從未占而孚契人心不戒而謀同時利惟淮南李景負固不賓陛下神畧內融大權潛運整軍經武倏往忽來戎路一巡則八州降附靈旗再指則四塞蕩平歸命者一一皆存來戰者萬萬無免偏師獻捷迨有百數仁贍交背以請命壽春全城而北遷淮上咽喉古來未有命以衆擊寡以尊伐卑以正破僞以強陵弱鮮不克矣然兵道貴速速則惠民在敵境者免驅掠俘馘之無期處內地者免資糧供億之爲役荆湖兩浙並有舟師聞其水戰之利勝於淮寇皆未肯協心齊力

犄角成功者蓋慮吞韓併魏滅虞兼號唇亡齒寒勢之懼也陛下宜分命使臣諭其成策錫之以丹書鐵契質之以左宗右社其三方協同大舉如秣陵淪陷南服懷柔則元功盛勲當崇賞厚報俾百世傳襲保其江山旌旗服章僚屬官秩咸用舊制朝廷弗詢彼旣得信誓之文又蒙寬大之詔必能稟大君之神算藉清廟之靈祥親督蒙衝橫江長驚李景必分兵禦拒首尾支離陛下乃躬御六師方軌南進駐驛江北圖惟厥成則濠廬等州可不攻而拔矣

請禁諸鎮酷刑疏

臣伏覩名律例疏云死刑者古先哲王則天垂象本欲生之義期止殺絞斬之坐皆刑之極也又准天成三年閏八月二十三日勅行極法日宜不舉樂減常膳又刑部式決重杖一頓處死以代極法斯皆仁君哀矜不捨之道也竊以蚩尤爲五虐之科尚行鞭朴漢祖約三章之法止有死刑絞者筋骨相連斬者頭項異處大辟之目不出兩端淫刑所興近聞數等蓋緣外地不守通規肆率情性或以長釘貫人手足或以短刀斲割人肌膚乃至累朝半生半死俾怨聲而上達致和氣以有傷將宏守位之仁在峻惟

刑之令欲乞特下明勅嚴加禁斷

陳政事疏

臣伏觀御札應內外臣寮有所見所聞並許上章議論者臣非才寡識備位曠官仰承綸綍之言聊貢芻蕘之說其一日伏以設官分職授政任功欲爲政之有倫在命官之無曠今朝廷多士省寺華資無事有員十乃六七止於計月待奉計年待遷其中廉幹之人不無愧恥之意如非厯試何展公才伏請改兩畿諸縣令及外州府五千戶上至縣令爲縣大夫昇爲從五品下畿大夫見府尹亦如令之

儀其諸州府縣大夫見本部長官如賓從之禮郎中員外郎起居補闕拾遺侍御史殿中侍御史監察御史光祿少卿以下四品太常丞以下五品等並得衣朱紫爲之滿日當在朝一任約舊官遷二等自拾遺監察除授迴日卽爲起居侍御史中行員外郎若前官不是三署卽罷後一年方得求事如此則士大夫足以陳力賢不肖無以駕肩各繫否臧明行黜陟利民益國斯實良規其二曰爲國爲家之方守穀守帛而已二者不出於國而出於民其道在天其利在地得其理者蕃阜增積失其理者耗嗇焦勞民之

顯蒙宜有勸教伏請於齊民要術及四時纂要韋氏月錄之中采其關於田蠶園圃之事集爲一卷下三司彫木版廣印頒下諸州流布民間

貞元泗州大水論

夫水沴所具厥有二理一曰數二曰政天地有五德一曰潤二曰暎三曰生四曰成五曰動五德者陰陽之使也陰陽者水火之本也陰陽有常德故水火有常分奇耦收半盈虛有準謂之通正羨倍過亢極無不至謂之咎徵二者大期率有常數除之主始於淵獻水之行紀於九六凡千

有七百二十有八歲爲浩浩之會當是時也陰布固陽澍
雨天下百水灌注漲其通川岸不受餘則旁吞原濕科坎
平概則漂墊方割雖堯舜在上臯夔佐政亦不能弭其沴
也過此以還則係於時政如其后辟狂妄以自率權臣冒
昧以下專政不明賢不章則苦雨數至潦水積厚非陰陽
之數也貞元壬申之水非數之期乃政之感也德宗之在
位也啟導邪政狎暱小人裴延齡專利爲心陰潛引納陸
贄有其位棄其言由是明明上帝不駿其德乃降常雨害
於塗盛百川沸騰壞民廬舍固其宜也王者苟能修五政

崇五禮禮不瀆政不紊則五日一霏微十日一霖霖十五日一滂沱謂之時雨所以正五運之制節占象晷刻無有差爽則神農之世其驗歟

陶穀

穀字秀實邠州新平人本姓唐避晉祖諱改焉起家校書郎累拜中書舍人仕漢爲給事中仕周爲右散騎常侍顯德初授戶部侍郎改翰林學士三年遷兵部侍郎加承旨六年加吏部侍郎入宋累官戶部尚書開寶三年卒

賜華山處士陳搏勅

朕以汝高謝人寰棲心物外養太浩自然之氣應少微處士之星旣不屈於王侯遂甘隱於岩壑樂我中和之化慶乎下武之期而能遠涉山涂暫來城闕浹旬延遇宏益居多白雲暫駐於帝鄉好爵難靡於達士昔唐堯之至聖有巢許爲外臣朕雖寡薄庶遵前鑒恐山中所闕已令華州刺史每事供須乍返故山履茲春序緬懷高尚當適所宜故茲撫問想宜知悉

紫芝白兔頌

陛下嗣位之元年歲次甲寅薄伐太原興六月之師定王

業也虎賁振旅兵渡孟津汜水獻紫芝三莖煜煜分化惹
度關之氣越三載歲在丙辰親征淮夷破十萬之衆宣武
功也戎輅旋軫途次商唐潁川獻白兔一頭皎皎効質凝
照社之光謹案瑞應圖曰王者恩霑行葦則紫芝秀五行
傳曰國君德及昆蟲則白兔馴上宴息之暇有時臨翫覩
禎祥而修德善馴擾之遂性紫者昭萬物肇生之數白者
叶太素返樸之義芝爲瑞也左盤右屈而自然成形兔之
異也或白或蒼亦不常其色豈可使曠代嘉瑞來者無聞
今聖君儉德罷露臺至仁祝疎羅重林衡不時之禁則草

木茂矣崇宗廟初祭之禮則禽魚樂矣若然則朱草蓂莢
將擢秀於庭除丹鳳麒麟豈空遊於郊數下臣不佞再拜
作頌頌曰

美哉靈草邈矣明視慶上帝之所臨昭王者之嘉瑞考其
詳稽其事芝爲草也豈奪朱而効靈兔乃獸焉取守黑而
爲異徵其薦瑞之日俱在迴鸞之次酌物情順天意吾君
當垂衣而治

請疏理獄訟瘞埋病亡奏

臣任監察御史日畱臺西京竊見臺司詳斷者至於夫婦

金匱要略卷之三
之間小小爭訟動引支證淹滯積時乃坊市死亡喪葬又
須臺司判狀奴婢病亡又須檢驗人吏貪狡因此邀求動
經旬時不遂埋瘞是臣目擊常嫉弊訛者

請禁伐桑棗奏

竊以稼穡爲生民之天機杼乃豐財之本是以金根在御
王者用三推之儀鞠衣載陳后妃有躬桑之禮則知自天
子至於庶人不可斯須忽於農桑也又司馬遷著書曰齊
魯之間千畝桑安邑千樹棗其人與千戶侯等伏見近年
以來所在百姓皆伐桑爲柴忘終歲之遠圖趨一日之小

利旣所司不禁乃積習生常苟桑柘漸稀則繒帛須闕三
數年內國用必虧雖設法課人種桑且無及也舊木已伐
新木未成不知絲繇欲憑何出若以下民方困不可禁之
儻砍伐一空所在如是歲或不稔衣食盡忘饑凍逼身須
爲羣盜圖難於易哲王令猷作事謀始有國常務乞畱眷
覽詢訪輔臣欲望特下明勅此後不得以桑棗爲柴官場
亦不許受納州縣城門不令放入及不得囊私置賣犯者
請加重罪

請郡牧不與卑冗官同班奏

內外臣寮正衙辭謝內則諸司小吏與宰相差肩外則屬
郡末寮共元戎接武欲望宰臣使相依舊押班其郡牧藩
侯臺省少監長吏等不得令部內本司卑冗官員同班辭
謝

請停廢教習舞郎奏

前任太常少卿伏見本寺見管教坊二舞本戶州縣尹民
若不盡免差徭無緣投名鼓舞況正殿會朝已久停廢其
見管人數等每有淪亡皆擬填補旣不曾教習但虛免差
徭伏乞且議停廢勅樂工宜令教習舞郎權且停廢

龍門重修白樂天影堂記

祭法曰法施於人則祀之洛書曰王者之瑞則圖之世稱
白傅文行此造化之功蓋後之學者若羣鳥之宗鳳凰百
川之朝滄海也秉筆之士由斯道而取位卿相者十七人
焉得不謂法施於人耶王者之瑞耶饗廟食畫雲臺可矣
矧山椒遺像乎陟彼高岡慷慨前事松凋宰樹蕭瑟古埏
之上伊注逝川潏潏荒祠之下歲月未積棟宇將壞考其
由中和初黎民經之而弗勤詢其制長興末秦王修之而
弗至人神元感屬在興運今居守佐相太原武公自許下

之撫三川也登鄂坂望太室且曰茲邑也周公測景之地
土圭在焉吾當正厥躬臨甸民以報天子既下車闢污萊
以實倉廩寬獄市以處豪猾繇是十一之稅均三千之條
省暇日巡魏闕過天街又曰茲地也成王定鼎之郊王氣
猶屬吾當尋舊地舉墜典以壯皇居遂上法象緯以嚴端
門構鴻梁而跨洛水繇是知拱辰之位肅朝天之路通三
載陟明我無慚德廣順三禩歲在癸丑暮春之初予因芟
除入洛獲謁拜上公趨魏絳之庭金石在列入亞夫之戶
榮戟生風初戢我以升降視之禮也復接我以酒漿觀予

志也始三揖而進終百拜而退旣予旋軫相訪政事對曰
河橋破虜之勲有京觀在滹水禦守之畧有金湯在雖三
尺童子盡能知之予無可述因以白公影堂爲說公曰我
武臣也惟干戈是執昧俎豆之事幸爲我序白氏政績及
修葺之義俾後之聞者足以勤爲善而嚮令名是吾志也
雖百金不吝矧土木乎予曰彼白公服則儒士也位則文
人也當官隸事烈有丈夫志祇於批逆鱗刺權幸塞左道
履平坦鎮陽拒命也指中人爲制將救日月之蝕則戰士
心悅武相遇盜也責京尹討賊犯雷霆之怒則奸臣股慄

杭州救旱因農隙而積湖水龍門通嶮出家財而鑿八灘
著策數十篇盡王佐之才有文七十卷導平生之志向使
得其位而且久行其道而不疑以憲宗之神武可繼文皇
也元和之刑政自同太宗也必當華夏宅心上東封之書
蠻夷屈膝納蕃街之貢豈直擒吳定蜀平一蔡州而已哉
言粗畢公聳身長揖而言曰異乎昔之所聞若此則白公
之才美實輔相之英者豈徒丈夫耶子其行矣子果得修
之于歸朝未再旬耶吏捧公書相授具報訖事穀乏口才
加之性嬾蟠挑拂漢非尺筮可量直以與公問答疏之如

右別刊貞珉

義成軍節度使贈太保史匡翰碑銘

并序

上關輔蜀望帝之洪苗楚倚相之厥裔迨於戰國世爲史官

周崇江漢之祠已疏王爵漢重金張之族遂寵侯封令望

不衰奇才閒出長江激浪下嶓冢以方舟寶劍騰晶發

關五

字積善所宜於有後享富貴者累朝大勲不可以中微啟

茅土者數世事詳圖牒功備鼎彝大王父諱懷清皇任安

慶九府都督王父諱敬思皇任安慶九府都督顯考諱建

關六

兼九府都督贈太保公卽太保長子也分太白之精

稟峒山之英笑腐儒之老一經拜神姝而學五兵懷鼓篋

之心行有餘力蘊飛箝之辨似不能言天祐中王室寢

字

陸之龍蛇競鬪生郊之戎馬成羣時

闕一字

宗已合樂

闕一字

將圖義舉定玉帳一匡之畧提金壇百勝之師戰於兩

河決平多壘以公人才地望宜副頒條起家

闕六字

代州副

使以勞加銀青光祿大夫檢校太子賓客兼監察御史改

遼州副使兼領九府都督同光初莊皇受命梁祚告終騏

驎關於東陵熒惑入於南斗負

闕六字

雖曰一家橫戈而猛

士守方未安四鄙將寧邊徼特委警巡以九府都督充嵐

憲朔等州都遊奕使解職授天雄軍牢城都指揮使遷檢

校刑部尚書兼御史大夫上柱

闕六字

恩遽降時議爲輕遙

領首城仍兼九府轉檢校戶部尚書潯州刺史未幾改天

雄軍步軍都指揮使刺史如故明年遷侍衛彰聖馬軍都

指揮使兼九府都督

闕六字

也

闕一字

大定萬國來朝將寶

憲於騎軍已平敵國收寇恂於河內俾惠一方授檢校司

空懷州刺史政成轉控鶴都指揮使加金紫階兼和州刺

史駙馬都尉虎賁三百

闕六字

魏闕九重謹門闌於清禁圃

田待理漢殿掄材功臣旌佐國之石出牧奉專城之寄渤

海守布解繩之政化洽下車淮陰侯有授鉞之才

闕一字膺

推轂謀於良帥屬在舊勲

闕六字

鷹揚之勞軾前熊伏寧淹

豹變之期齋壇峻而金鼓嚴麻案宣而油幢出漢壘接平

陽之第禹河連沁水之封控梁苑之西郊殷乎威望撫國

僑之遺俗綽有政聲當四

闕六字

命之爲伯加食邑通前五

百戶方司外禦俄迫內艱居喪爰疚於塊苦有司不避於

金革大君有命難違燾土之恩開國承家遂奉墨綬之制

授起復冠軍

闕五字

吾衛大將軍員外置同正員依前充節

度使列旌旗於衛幕再勵分憂泣風雨於梁山難勝永慕

海運方遠峯摧若何遺封章而不忘戴君對符印而猶思

擇帥三陽莫辯

關五字

之鍼六合至寬無處問迴生之草管

輅慊與才之歎仲尼興有命之言名不遂而功不成生何

足貴今其終而善其始歿且奚冤以天福七年三月十六

日寢疾薨於鎮享年四十

關五字

人罷市年光似箭訝天道

於張弓日遞高春輟時情於相杵有詔贈太保喪葬之儀

並從加等越明年太歲在癸卯孟夏四月二十有三日庚

午歸葬於北京太原

關五字

也銘旌前導鹵簿分行何須陶

氏牛眠方爲吉地不待滕公馬立自得佳城載惟積慶之

家須及莫京之允尚魯國大長公主車服有容實殷帝之

歸妹穠華

闕五

之王姬半枯旋歎於來亡一慟俄聞於晝

哭風飄寶匣翻成別鶴之悲塵暗妝臺永結孤鸞之恨嗣

子四人長曰彥容宮苑使湊州刺史次曰彥澄彥琪並西

頭供奉官幼

闕五

州別駕以于公之陰隲門合容車以鄧

氏之舊親家宜藏策寵既隆於奕世榮豈讓於重侯近朝

以來莫之比也嘻以公之忠肅恭懿宜慈惠和求福罔回

見義有勇乘

闕五

達招延無間於後生不積財而

闕一

務

藏書不憂家而唯思報國求諸時彥我無

闕一

焉宜乎享

大年躋極品上擊九萬里直聳一千尋而陽報無徵天賦

有限極公侯伯子男

闕六字

生而無成守溫良恭儉讓之言

得以謂沒而不朽將傳來裔期播徽音合從魯國之襲方

盡延陵之美臣才非日地職在

闕二字

仰

闕五字

功聞

闕一字家

闕一字之

闕一字

德虔遵睿旨強綴斯文屬詞而徒罄揄揚序

事而多慚漏

闕一字

鞠躬抒思再拜銘勲將招岱岳之魂輒

效楚詞之意銘曰

闕五字

惠且貞事明君今信而誠藏策書於周廟

闕一字

征轂

於漢宮年既謝令時正來河方誓令山告頽訝陰隲而已

矣歎陽報而哀哉闕八帝鄉丹旆悠兮下山陽隔兩鄉之

明月陟千里之宏崗龜告吉兮著定臧年惟利兮日其長

繁蔓草於原上揭豐碑於路旁闕兆鶴且白兮來翔傳千

字闕一兮萬代播蘭杜之芬芳

楊昭儉

昭儉字仲寶京兆長安人後唐長興中進士歷殿中侍御

史仕晉累遷中書舍人周顯德中爲翰林學士改御史中

丞出爲武勝軍節度行軍司馬入宋累官禮部尚書太平

興國二年卒

諫宥張彥澤疏

天子君臨四海日有萬幾懋建諍臣彌縫其闕今則諍臣
雖設言路不通藥石之論不達於聖聰而邪佞之徒取容
於左右御史臺紀綱之府彈糾之司銜寃者固當昭雪爲
蠹者難免放流陛下臨御以來寬仁太甚徒置兩司殆如
虛器遂令節使慢侮朝章屠害幕吏始訴寃於丹闕反執
送於本藩苟安跋扈之心莫恤寃抑之苦願回睿斷誅彥
澤以謝軍吏